

重修興平縣志

興平縣志卷七

藝文志第七

雜文

吊茂陵文

方孝孺

祇明祀而言旋兮指槐里以西征停策憩于道傍兮觀高丘之
崢嶸卽故老而訊之兮惟漢武帝之茂陵整冠裳而疾趨兮躋
遺廟以屏營淒風起于叢棘兮飈颺嘯于幽塋慨雄心之靡託
兮悲曼志之無成惟君皇之御極兮適炎靈之方熾陋堯禹爲
未足遵兮卑祖武而弗肯繼內瘠民以自殖兮外震威乎遐裔
騁車轍于八荒兮候神人於海濱建千門與萬戶兮殫土木之

奢麗慕軒轅之騰化兮永傲睨乎斯世何盛業之易墮兮洪謀
鬱而難宣雖暫弱於戎胡兮生民疲弊而不痊倚禍機於巫蠱
兮妃胤丁毒而啣冤諒逞心於屠滅兮抑天道之致然關土疆
之宏廓兮會元宮之莫固赫兵革之繁庶兮委守衛於草露城
闕之崇廠兮永斷礎而無所後宮之詔治兮僅或傳其塚墓像
祈連以旌武兮想壯魄之已腐嗚呼哀哉形必有盡兮孰不有
亡匪君皇之獨然兮尙奚爲隱憫而迴遑惟祈生之已甚兮或
妖誑而過望謂長年而卒老死兮斯足垂戒於昏荒明固有所
不達兮智固有所短偉才略之英邁兮哲與愚其相半賴聖表
而默出邪兮兼善悔而能斷雖人恫而財竭兮終克免乎危亂

原
书
缺
页

原书缺页

悼往者之無知兮尙來者之可諫感盛衰而相襲兮仰昊天而永嘆

馬援贊

前人

矯矯馬公惟志之偉志在功名氣不少萎貧堅老壯公言則然
懷奇蘊朴罕識其賢雲乎鬱鬱雷乎震震紫色龍聲炎輝斯盡
公晦于時爰牧爰蓄颺氛九縣顧瞻安之曰述曰囂狼貪豕飽
鄙不少留聿永漢道來觀真主應對疏通謂帝大度高祖則同
遂委臣贊遂効臣節聚米討羌醜虜蕩越四方底平人懷安娛
公不宴佚許國以軀滔滔武陵蠢蠢雜種梗化撓邊負險恃勇
公曰茲役老臣馳驅堅請上行秉節舒舒不驚不亟既安且式

興平縣志
試兵臨賊旋卽摧辟厄于壺頭匪公之尤天少須假孰測厥猷
公雖沒世因則成事乃招乃來羣蠻無貳云胡巧夫讒言朋興
豈不暫翳事久則明迄茲千載有顯愈赫名徹聽聞功載史冊
茲纂其詞爲示無極

雲敞贊

前人

人之趨勢皆若可託觀于生死乃見厚薄朝以爲師暮則背之
人實易誑心其可欺嗚呼雲子志剛氣烈曷以知之赫然大節
妻子在後鈇鑕在前所見者義吾何恤焉吾身可恤師其可負
視彼更名犬鼠之伍道喪民散俗益壞偷面恭背違犬鼠所羞
不與其難矧狗其死我獨何人嗚呼雲子

織錦回文記

前秦苻堅時秦州刺史扶風竇滔妻蘇氏陳留令武功道質第三女也名蕙字若蘭知識精明儀容秀麗謙默自守不求顯揚行年十六歸於竇氏滔甚敬之然蘇性近於急頗傷妬嫉滔字連波右將軍貞之孫朗之第二子也風神秀偉該通經史允文允武時論高之苻堅委以心膂之任備厯顯職皆有政聞遷秦州刺史以迂旨謫戍燉煌會堅寇晉襄陽慮有危逼藉滔才略乃拜安南將軍留鎮襄陽焉初滔有寵姬趙陽臺者歌舞之妙無出其右滔置之別所蘇氏知之求而獲焉苦加捶辱滔深以爲憾陽臺又專伺蘇氏之短諂毀交至滔益忿焉時氏年二十

一及滔將鎮襄陽邀其同往蘇氏忿之不與偕行滔遂攜陽臺之任斷其音問蘇氏悔恨自傷因織錦回文五綵相宣瑩心耀目其錦縱廣八寸題詩二百餘首計八百餘言縱橫反覆皆成章句其文點畫無缺才情之妙超今邁古名曰璇璣圖然讀者不能盡通蘇氏笑而謂人曰徘徊宛轉自成文章非我佳人莫之能解遂發蒼頭齎致襄陽焉滔省覽錦字感其妙絕因送陽臺之關中而具車徒盛禮邀迎蘇氏歸於漢南恩好愈重蘇氏著文詞五千餘言屬隋季喪亂文字散落追求不獲而錦字回文盛見傳寫是近代閨怨之宗旨屬文之士咸龜鏡焉朕聽政之暇留心墳典散帙之次偶見斯圖因述若蘭之才復美連波

之悔過遂製此記聊以示將來也如意元年五月一日大周天
册金輪皇帝御製

馬援碑記

薛瑄

夫其韜晦自養散財濟難公之大志也鄙斥奸豪獨歸眞主公
之大識也奇謀勇烈光輔中興公之大功也不懷宴安以死勤
事公之大節也世之人臣四者有一焉猶足以名當時而垂竹
帛公乃兼而有之而又本之以忠誠積久之心宜其功蓋當時
名垂後世而血食無窮焉

重修城隍廟碑記

馬理

三原人

興平故有城隍廟在縣治北東西街中元至正二年建皇明成

化十四年增廣之者王令琮也嘉靖初修葺阻於讒頑者王令
玉鉉也今重修而底績者郭令也王令嘗用里甲夫役庫藏錢
修用是讒頑誣訟之官後事白讒頑死於臬司然亦弗卒事焉
郭令鑒之不起一夫不動藏庫一錢惟用鄉老率諸義民效力
不足則以贖刑金補之故迄工而人無議焉廟之成也令祀以
落之祝諸神曰官於斯者其有剝民以自肥者乎時謂之貪其
有殺人以自恣者乎時謂之酷有一於此神必殛之俾窮困麗
刑短折異鄉毋得肆惡於上可也民於斯者其有爲惡於家不
孝於親不弟於長者乎其有爲惡於鄉凌暴寡弱蔑視官法者
乎有一於此神必殛之俾災禍薦臻生養不遂毋得作惡於下

可也神能如是吾官民斯畏而敬之使廟貌常新祀事豐腆否
則神亦不靈人其不玩之哉於是聞者惕然咸生善心廟爲正
殿五間寢獻殿如之穿堂二間廊廡共五十餘間二門一爲間
五大門一爲間三傍角門二靈祐坊一廟基前闊九丈七尺長
二十三丈後闊一十七丈長二十六丈造工於嘉靖庚子二月
一日迄於壬寅八月一日郭令名孔完字元成新鄉人由舉人
嘗廬墓六年鄉以孝稱在官清謹有爲撫巡屢以賢能勞薦之
督工鄉老范萬齡楊廷美閻珂三人請記其事者張元極李綸
二生員也廟有祠堂二其祀王令者郭令不能止諸民祀郭令
者止之民亦弗能違也

重修奎樓碑記

邑令胡蛟齡

涇縣人

興平縣治東南有翼然而出於城闌之上者曰奎神樓始自前令張公弘圖所創建也考諸天官之書奎爲西方七宿之一聯璧辰枕參首是爲文章之府而五星聚奎見於前史氏說者以爲主文昌故世之言文者求端於天必歸諸奎其來遠矣易曰觀乎天文以察時變觀乎人文以化成天下夫文之所該者博非圖書簡冊之謂也然自結繩易而書契興聖人代作繼天立極六經乃出凡夫三才之彀列萬物之變化明而禮樂之頤幽而鬼神之奧舉莫不條貫乎其中是則文雖不盡於此而天人之蘊亦寧有出於圖書簡冊之外哉奎麗於天而主乎人以其

近於天也故神之而立祠以祀焉此宜於經無悖者也樓建於康熙三十六年至四十七年又增脩之迄今歷歲既久漸就傾頽邑之人士相聚言於余謀因其舊而新之今歲之秋百穀用成載登大有乃於農隙鳩功不日而就於是所謂奎神樓者峨峨然復舊觀矣抑嘗聞張公精於堪輿之術其爲此樓蓋欲抗東南之庫下以崇文位故特揭之雉堞間余於地師之說初未嘗習然而張公當日用意之勤蓋不可沒而今之脩之亦猶祖述張公之意也乃并著之而刻其襄事者之姓名於碑陰

朱公德政碑記

邑人吉來獻 御史

朱公南都上元人尹興平三年政成百姓安業士子樂育闔邑

士民感公之德而頌聲作或曰公迎養榮親朝夕竭承顏之敬
資事父以樹風化倡彝倫以篤孝道脩縣學以作士類敬以養
親以安親以表正也德莫尚焉政莫先焉爲之賦錫類或曰公
紀律嚴明法無出入賞不加乎頑民罰弗及於無辜倉有積粟
以備饑案無滯牒以奉公里編保甲以防盜革村喧社舞之觀
惇補弊鋤兇之典訟以平政以理勸沮以章矣爲之賦嘉樂或
曰吏俗之敝也征歛之無藝也窮黎之願賦也公重撫字略催
科徭役均編而有定則丁糧均派而有定額夫馬均差而有定
數豪右無匿稅之奸貧窮免流移之苦休戚與民關好惡與民
同矣爲之賦樂只或曰蒐閱能閑則武威立團練有法則民兵

振公精器械以造弓弩練卒伍以習射藝訪陣圖以倡勇敢躬
臨固原查盤軍實訂謀足以寄百里之命遠猷足以舒三軍之
急實經略素定者爲之賦千城或曰公以敬畏事上官以勤慎
守職業以誠信待士夫以惠愛理下民以遏囂抗之習以辦刁
猾之訟奸宄竄伏良民輯睦令聞廣而嘉譽昭矣爲之賦青蠅
或曰公以剔煩之才調治興平時遭地變謹封守以備不虞固
堡圍以防奸宄嚴幾察以盤謀間明斥堠以禁夜掠高城樓以
戍遠望四門煥然巍然功成於不日民觀於子來興平百世之
利也近境郡縣脩城鮮儷焉爲之賦經始或曰公江南俊彥也
稟資溫雅抱德清廉名恥以賄立功恥以倖成初筮學宮木鐸

振而桃李生輝閱試南粵取士得而豪英彙進再選三秦檢文
精而士子推轂首重儒學作新文廟當道臨堂而稱獎士子立
碑以積功美惡不渝淑慝以別政績有徵法治有則馭吏有規
蒞民有度賓見有儀燕享有時禋祀有典送迎有節尊賢有等
士民從化將益勸矣爲之賦鹿鳴或曰頌如斯而已乎吉子曰
寓仁義以行法律本儒道以飾吏治公之治邑朱令雲旌欄之
芳聲也公之作人朱考亭道學之源流也我思古人實獲我心
興平先民如董仲舒司馬相如楊雄馬融鄭元張衡之徒或令
茂陵或產茂陵或徙居茂陵或游學茂陵皆振古奇人也培植
人才古今如一吾邑士民庇蔭公之樹德樹思者寧不益勉矣